



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

Anr.331/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Faton Ademi kryesues, Milena Deric dhe Zyhdi Haziri anëtarë, me pjesëmarrjen e zyrtares ligjore Blerta Peci, duke vendosur përkitazi me ankesën e BIRN dhe Internews, paraqitur kundër subjektit politik Aleanca për Ardhmërinë e Kosovës, për shkak të shkeljes së Kodit të Mirësjelljes për Subjektet Politike, Mbështetësit e Tyre dhe Kandidatët, për Zgjedhjet e Parakohshme për Kuvendin e Republikës së Kosovës që do të mbahen më datë 14 Shkurt 2021, në seancën e panelit të mbajtur më datë 08.02.2021, mori këtë:

V E N D I M

I. PRANOHET e bazuar ankesa e BIRN dhe Internews, ndërsa subjektit politik Aleanca për Ardhmërinë e Kosovës (AAK), me seli në Prishtinë, i shqiptohet dënimi me gjobë në lartësi prej 4,000.00 (katër mijë) euro, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, me rastin e promovimit të subjektit politik dhe kandidatit të këtij subjekti, duke e shfrytëzuar burimet e institucionit-zyrës së Ministrisë të Drejtësisë të Qeverisë së Republikës së Kosovës, me qëllim të përfimit elektoral, në fushatë zgjedhore, për zgjedhjet e parakohshme për Kuvendin e Kosovës, që do të mbahen me datë 14.02.2021.

II. Detyrohet Subjekti Politik Aleanca për Ardhmërinë e Kosovës (AAK), me seli në Prishtinë, që gjobën e shqiptuar si në pikën -I-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi, nën kërcënim e shqiptimit të dënimit shtesë.

A r s y e t i m

BIRN dhe Internews, ka parashtruar ankesë në PZAP A.nr 331/2021 më datë 04.02.2021, me të cilën pretendon se kandidati për deputet nga radhët e Aleanca për Ardhmërinë e Kosovës AAK, Selim Selimi, me datën 03.02.2021 në ora 18:00 rrjetin e tij social facebook ka publikuar një video përmes së cilës ka bërë thirrje për ta votuar. Mirëpo me rastin e përgatitjes së kësaj video i njëjti ka përdorur asetet publike, gjë e cila është e ndaluar me Ligjin për Zgjedhjet e Përgjithshme. Në videon e publikuar shihet Ministri në detyrë Selim Selimi duke folur për të arriturat e tij si Minister, ndërsa në fund të videos shfaqet emri i tij me numrin në listën zgjedhore të subjektit politik AAK. Parashtruesi i ankesës si provë ka bashkangjitur sekuenca nga video inqizimi nga hapësira e zyrës.

Subjekti politik Aleanca për Ardhmërinë e Kosovës, në përgjigjen në ankesë të datës 05.02.2021, deklaroi se janë marrë masa përmirësuese, ku është evituar shkelja duke larguar

nga llogaria e kandidatit Selim Selimi në rrjetin social facebook videon e publikuar, dhe kjo dëshkohet me fotografitë e bashkangjitura në përgjigje. Më tej në përgjigje në ankesë shtojnë se video në fjalë është realizuar duke përdorur kamerat dhe të gjitha pajisjet private dhe asnjë aset shtetëror nuk është përdorur për realizimin e videos, dhe zyra e ministrit nuk është përdorur me qëllim të përfitimit të votave pasi që nuk është mbajtur ndonjë takim elektoral.

Paneli, pasi që shqyrtoj të gjitha shkresat e lëndës në kuptim të nenit 117 par. 2 të LZP-së, gjeti se:

Ankesa është e bazuar

Nga shkresat e lëndës vërtetohet se Organizata BIRN dhe Internews Kosova me seli në Prishtinë, ka parashtruar ankesë PZAP A.nr 331/2021 më datë 04.02.2021, me të cilën pretendon se kandidati për deputet nga radhët e Aleanca për Ardhmërinë e Kosovës, Selim Selimi, me datën 03.02.2021 në ora 18:00 rrjetin e tij social facebook ka publikuar një video përmes së cilës ka bërë thirrje për ta votuar. Pas pranimit të ankesës në PZAP, e njëjta i është dërguar subjektit politik AAK për përgjigje në ankesë.

Subjekti politik AAK me datë 05.02.2021, ka paraqitur përgjigje në ankesë, duke i kundërshtuar në tersi pretendimet e ankuesit të parashtruara në ankesë dhe duke kërkuar që ankesa të refuzohet e pa bazuar.

Duke u nisur nga gjendja e konstatuar faktike, Paneli konstaton se nga provat e ofruara shihet qartë se kandidati Selim Selimi nga radhët Aleanca për Ardhmërinë e Kosovës (AAK), përmes veprimeve të tij, promovimit të subjektit të tij politik dhe vetvetes përmes spotit publicitar duke shfrytëzuar hapsirat-zyret e Ministrit të Drejtësisë pra asetet publike ka vepruar në kundërshtim me Kodin e Mirësjelljes për Subjektet Politike, Kandidatët dhe Mbështetësit neni 35.1 e LZP-së, ku parashihet se *“Personi i cili mbanë pozitë publike, i zgjedhur apo i caktuar, nuk mund të përdorë atë zyrë ose ndonjë nga pasuritë e saj për qëllim të përfitimit të votave...”* duke bërë publik emrin e tij me numrin në listën zgjedhore të subjektit politik Aleanca për Ardhmërinë e Kosovës, gjë e cila është veprim i ndaluar sipas LPZ-së.

Përdorimi i aseteve publike, çoftë zyre, apo objekte tjera, me qëllim përfitimi elektoral, nënkupton shfrytëzim të pasurisë në fjalë në kundërshtim me dedikimin e tyre, meqenëse pasuria apo asetet në fjalë janë të Shtetit të Republikës së Kosovës, të mbrojtura nga tendenca e përdorimit të tyre për përfitime personale. Të njëjtat janë në posedim dhe shfrytëzim nga ana e personave në fjalë vetëm gjatë kohës së ushtrimit të funksionit/mandatit pasi janë të lidhura me funksion/mandat, si dhe me përfundimin e funksionit apo mandatit humbet e drejta e shfrytëzimit të tyre.

Ky përfundim ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim

të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit.

Paneli me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, pjesëmarrjen e subjektit politik Aleanca për Ardhmërinë e Kosovës në zgjedhjet e mëparshme që konsiston në faktin se kandidati për deputet nga radhët e këtij subjekti, Selim Selimi, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje dhe në zgjedhjet e mëparshme në Kosovë që do të thotë se i njëjti është i njoftuar me rregullat zgjedhore si dhe shumën e fondeve që ka marrë subjekti politik prej Buxhetit të Republikës së Kosovës. Paneli ka marrë parasysh po ashtu edhe përgjigjen në ankesë të subjektit politik AAK, ku theksohet se video incizimi është larguar nga rrjeti social facebook, si dhe me rastin e hetimit të facebook-ut të kandidatit në fjalë nuk ka hasur në video spotin për të cilin i është shqiptuar gjoba, andaj kjo i është vlerësuar ndërmarrje e veprimeve përmirësuese, e cila ka ndikuar në lartësinë e gjobës së shqiptuar si në dispozitiv të këtij vendimi.

Përveç të cekurave më lartë Paneli, me rastin e vendosjes i vlerësoi edhe të gjitha pretendimet e subjektit politik Aleanca për Ardhmërinë e Kosovës, në kuadër të pretendimeve të theksuara në përgjigje në ankesë, mirëpo të njëjtët ishin jo relevante dhe pa ndikim për një vendimmarrje ndryshe nga ajo që është vendos.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ 120.2 Dështimi për të paguar dënimin apo për t’ju bindur një urdhërese të PZAP-it brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i. ”, ashtu siç është vendosur në pikën II të dispozitivit të këtij vendimi.

Paneli në kuptim të nenit 120.1, pika c), dhe nenit 118.1, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.331/2021 me datën 08.02.2021

Kryesuesi i Panelit
Faton Ademi



Këshilla Juridike: Kundër këtij vendimi nuk lejohet ankesa konform nenit 118 par 4 të LZP-së